

ՀՀ ՊԵՏԱԿԱՆ ԵԿԱՄՈՒՏՆԵՐԻ ԿՈՄԻՏԵԻ
ԻՐԱՎԱԲԱՆԱԿԱՆ ՎԱՐՉՈՒԹՅՈՒՆ

Ո Ր Ո Շ ՈՒ Մ թիվ -250

ՎԱՐՉԱԿԱՆ ՏՈՒՅԺ ՆՇԱՆԱԿԵԼՈՒ ՄԱՍԻՆ

«24» օգոստոսի 2023թ.

ք. Երևան

Ես՝ ՀՀ պետական եկամուտների կոմիտեի իրավաբանական վարչության ղեկավար Արման Մնացականյանս, քննելով՝ Ղազախստանի Հանրապետության քաղաքացի Բարլիբաևա Մադինայի (Անձնագիր՝ N13391784, հասցե՝ ՀՀ, ք. Ալմաթա, Ձերդելի փողոց, տուն 20) նկատմամբ հարուցված մաքսային կանոնների խախտման վերաբերյալ գործը,

Պ Ա Ր Չ Ե Ց Ի՝

ՀՀ ՊԵԿ Արևմտյան մաքսատուն-վարչության աշխատակիցները 2023 թվականի մայիսի 21-ին «ԱՄՕ» ՓԲ ընկերության «Զվարթնոց» օդանավակայանի ուղևորային մաքսային հսկողության գոտում անձնական զենման են ենթարկել Ստամբուլ-Երևան «PC 550» համարի չվերթով Թուրքիայից ՀՀ ժամանած և «կանաչ ուղի» մուտք գործած Ղազախստանի Հանրապետության քաղաքացի Բարլիբաևա Մադինային: Արևմտյան մաքսատուն-վարչության ՈԻՄՀ բաժնի մաքսային ծառայողները մաքսային զննում իրականացնելու նպատակով վերջինիս ուղեկցել են «կարմիր ուղու» գոտի, որտեղ զննում իրականացնելու արդյունքում քաղաքացու կրծկալի միջից հայտնաբերվել է 19 հատ ոսկյա մատանի, 4 հատ ոսկյա ականջոդ, ընդհանուր՝ 51.3 գրամ քաշով:

Փաստի առթիվ ՂՀ քաղաքացի Բարլիբաևա Մադինայի նկատմամբ «Մաքսային կարգավորման մասին օրենքի» ՀՀ օրենքի 313-րդ հոդվածի հատկանիշներով կազմվել է մաքսային կանոնների խախտման վերաբերյալ արձանագրություն, իսկ ապրանքը, որպես անմիջական իրավախախտման օբյեկտ վերցվել և կնքվել է թիվ RA507048 համարի կնիքով և ի պահ է հանձնվել «Զվարթնոց» օդանավակայանի ուղևորային մաքսային հսկողության պահեստում:

Վարչական վարույթի ընթացքում ՂՀ քաղաքացի Բարլիբաևա Մադինայի բացատրություն է տվել այն մասին, որ 21.05.2023թ-ին Ստամբուլ-Երևան չվերթով ՀՀ ժամանելիս ընտրել է մաքսային հսկողության «կանաչ» ուղի ընթացակարգը, որովհետև բոլոր քաղաքացիներ այդ ժամանակ անցել են այդ ուղիով, որից հետո ինչպես մյուս քաղաքացիները այնպես էլ Բարլիբաևա Մադինայի անցել է «կարմիր» ուղի ընթացակարգով: Հայտնել է, որ նշված ոսկյա զարդերը, որոնք նախապես թաքցրել է իր կրծկալում ի սկզբանե ուղեբեռի զննման ժամանակ չի տեղեկացրել մաքսային մարմնին և միաժամանակ հայտնել է, որ իր մոտ առկա գումարը միշտ տեղադրում է այդտեղ, ուստի այդ դեպքում էլ որոշել էր ոսկյա զարդերը տեղադրել նույն վայրում:

Վերոնշյալ ոսկյա զարդերի շուկայական արժեքը 2023 թվականի մայիսի 21-ի դրությամբ որոշելու համար՝ 06.06.2023թ. նշանակվել է նյութագիտական և ապրանքագիտական համալիր փորձաքննություն, որի կատարումը հանձնարարվել է ՀՀ «Փորձաքննությունների ազգային բյուրո» պետական ոչ առևտրային կազմակերպության փորձագետին:

21.07.2023 թվականին կայացված որոշմամբ վարչական վարույթի ժամկետը երկարաձգվել է մինչև փորձագիտական եզրակացություն ստանալը:

ՀՀ «Փորձագիտական կենտրոն» պետական ոչ առևտրային կազմակերպության փորձագետի 17.07.2023թ. թիվ 23-0103Պ եզրակացության համաձայն՝ փորձաքննությանը ներկայացված

վերոնշյալ ոսկյա զարդերի շուկայական արժեքը 2023 թվականի մայիսի 21-ի դրությամբ կարող էր կազմել նվազագույն արժեքով քարերի դեպքում՝ 959 000 ՀՀ դրամ, իսկ առավելագույնի դեպքում՝ 3 034 000 ՀՀ դրամ:

Պարզելու համար, թե որքան է կազմել վերոնշյալ զարդերի մաքսային արժեքը՝ 21.07.2023թ. գրությամբ հարցում է կատարվել ՀՀ ՊԵԿ Մաքսային հսկողության վարչություն, որտեղից ստացված 10.08.2023թ. պատասխան գրության համաձայն՝ 2023թ մայիսի 21-ի դրությամբ վերոնշյալ ոսկյա զարդերի առանց քարերի մաքսային արժեքը կկազմի՝ 405 291 ՀՀ դրամ, որից մաքսատուրք՝ 405251 ՀՀ դրամ, իսկ ԱԱՀ՝ 89184 ՀՀ դրամ, իսկ զարդերի քարերով մաքսային արժեքը կկազմի՝ 321203 ՀՀ դրամ, որից մաքսատուրք՝ 32117 ՀՀ դրամ, իսկ ԱԱՀ՝ 70680 ՀՀ դրամ: Միաժամանակ հայտնվել է, որ նշված ապրանքի ներմուծման դեպքում առաջանում է ոչ սակագնային կարագավորման միջոցների կիրառում:

«Վարչարարության հիմունքների և վարչական վարույթի մասին» ՀՀ օրենքի օրենսգրքի 43-րդ հոդվածի 1-ին մասի 2-րդ կետի համաձայն՝ անձի և վարչական մարմնի փոխհարաբերություններում ապացուցման պարտականությունը կրում է վարչական մարմինը՝ անձի համար անբարենպաստ փաստական հանգամանքների առկայության դեպքում:

Տվյալ դեպքում ոսկյա զարդերի մաքսային արժեքը որոշելիս հիմք է ընդունվել մաքսային արժեքի առավելագույն չափը, քանի որ փորձաքննությամբ հաշվարկվել են քարերի առկա քանակին և չափերին համապատասխան անգույն թափքանցիկ քարերի առավել հավանական տեսակների միջին շուկայական արժեքները:

ԵԱՏՄ մաքսային օրենսգրքի 2-րդ հոդվածի 1-ին մասի 25-րդ կետի համաձայն՝ «Միության մաքսային սահմանով ապրանքների անօրինական տեղափոխում է համարվում ապրանքների տեղափոխումը Միության մաքսային սահմանով այն վայրերից դուրս, որոնցով, սույն Օրենսգրքի 10-րդ հոդվածին համապատասխան, պետք է կամ կարող է իրականացվել ապրանքների տեղափոխումը Միության մաքսային սահմանով, կամ այդ վայրերում գտնվող մաքսային մարմինների աշխատանքային ժամանակից դուրս, կամ մաքսային հսկողությունից թաքցնելու կամ ապրանքների ոչ հավաստի հայտարարագրման կամ չհայտարարագրման կամ ապրանքների վերաբերյալ ոչ հավաստի տեղեկություններ պարունակող փաստաթղթեր օգտագործելու միջոցով եւ (կամ) նույնականացման կեղծ կամ այլ ապրանքներին վերաբերող միջոցներ օգտագործելու միջոցով:

«Մաքսային կարգավորման մասին» ՀՀ օրենքի 301-րդ հոդվածի 1-ին և 2-րդ մասերի համաձայն՝ մաքսային կանոնների խախտում է համարվում անձի կողմից կատարված անօրինական գործողությունը կամ անգործությունը, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով Հայաստանի Հանրապետության մաքսային սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենսգրքով նախատեսված է պատասխանատվություն: Ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության:

«Մաքսային կարգավորման մասին» ՀՀ օրենքի 313-րդ հոդվածի համաձայն՝ Հայաստանի Հանրապետության պետական սահմանով մաքսային հսկողության ներքո գտնվող ապրանքների տեղափոխումը՝ մաքսային հսկողությունից թաքցնելով՝ գաղտնարանների օգտագործմամբ, ապրանքների հայտնաբերումը դժվարացնող այլ եղանակներով կամ ապրանքներին այլ տեսք տալու միջոցով՝ հանցագործության

հատկանիշների բացակայության դեպքում առաջացնում է տուգանք՝ այդ ապրանքների մաքսային արժեքի հիսուն տոկոսի չափով, բայց ոչ պակաս, քան մեկ միլիոն դրամի չափով:

«Մաքսային կարգավորման մասին» ՀՀ օրենքի 332-րդ հոդվածի 1-ին մասի համաձայն՝ մաքսային կանոնների խախտումների վերաբերյալ գործը քննվում է վարչական պատասխանատվության ենթարկվող անձի մասնակցությամբ կամ Վարչական իրավախախտումների վերաբերյալ ՀՀ օրենսգրքի 267-րդ հոդվածով սահմանված դեպքերում՝ տվյալ անձի բացակայությամբ, իսկ նույն հոդվածի 2-րդ մասի համաձայն՝ մաքսային կանոնների խախտումների վերաբերյալ գործը կարող է քննվել սույն հոդվածի 1-ին մասում նշված անձի բացակայության դեպքում, եթե անձը բացակայում է և հայտնի չէ նրա գտնվելու վայրը, կամ եթե նա գտնվում է Հայաստանի Հանրապետության սահմաններից դուրս:

Սահմանային էլեկտրոնային կառավարման տեղեկատվական համակարգի ուսումնասիրությունից պարզվել է, որ Բարլիբաևա Մադինան 2023 թվականի մայիսի 25-ի ժամը 23:23 թույլին դուրս է եկել ՀՀ-ից:

ՂՀ քաղաքացի Բարլիբաևա Մադինան 2023 թվականի օգոստոսի 24-ին հրավիրվել է ՀՀ ՊԵԿ իրավաբանական վարչություն՝ իր նկատմամբ «Մաքսային կարգավորման մասին» ՀՀ օրենքի 313-րդ հոդվածի հատկանիշներով սկսված վարչական գործի քննությանը մասնակցելու համար և միաժամանակ նախազգուշացվել, որ համաձայն «Մաքսային կարգավորման մասին» ՀՀ օրենքի 332-րդ հոդվածի՝ չներկայանալու դեպքում վարչական գործի քննությունը կիրականացվի իր բացակայությամբ, սակայն վերջինս չի ներկայացել:

Այսպիսով, նյութերով պարզվել է, որ 2023 թվականի մայիսի 21-ին Ղազախստանի Հանրապետության քաղաքացի Բարլիբաևա Մադինան ՀՀ մաքսային սահմանով մաքսային հսկողությունից թաքցնելով, այն է՝ իր կրծկալում տեղադրելով տեղափոխել է ընդհանուր 51,3 գրամ ընդհանուր քաշով 19 հատ ոսկյա մատանի, 4 հատ ոսկյա ականջոդ, առանց քարերի 405291 ՀՀ դրամ մաքսային արժեքով (որի 50%-ը կազմում է 202646 ՀՀ դրամ), իսկ քարերով զարդերի դեպքում 321203 ՀՀ դրամ մաքսային արժեքով (որի 50%-ը կազմում է 160 602 ՀՀ դրամ), այսինքն՝ վերջինս թույլ է տվել «Մաքսային կարգավորման մասին» ՀՀ օրենքի 313-րդ հոդվածով նախատեսված մաքսային կանոնների խախտում, ինչը հիմնավորվում է մաքսային կանոնների խախտման վերաբերյալ արձանագրությամբ, 21"05"2023 թվականի անձի մաքսային գնման թիվ 02 ակտով, մաքսային գնման թիվ 113 ակտով, ՊԵԿ մաքսային հսկողության վարչության 10"08.2023 թվականին գրությամբ և ՂՀ քաղաքացի Բարլիբաևա Մադինայի բացատրությամբ:

Հիմք ընդունելով «Մաքսային կարգավորման մասին» ՀՀ օրենքի 313-րդ, 334-րդ, 335-րդ հոդվածները.

Ո Ր Ո Շ Ե Ց Ի՝

1. Բարլիբաևա Մադինային ճանաչել զանցառու «Մաքսային կարգավորման մասին» ՀՀ օրենքի 313-հոդվածով և նրան տուգանել 1 000 000 ՀՀ դրամի չափով:

2. Որոշման մասին հայտնել Բ.Մադինային՝ պարզաբանելով, որ ՀՀ մաքսային կարգավորման մասին օրենքի 334-րդ հոդվածի 2-րդ կետի համաձայն՝ որոշումն ուժի մեջ է մտնում կայացման պահից, իսկ նույն հոդվածի 4-րդ կետի համաձայն՝ որոշումը կարող է բողոքարկվել «Մաքսային ծառայության մասին» օրենքի 37-րդ հոդվածով սահմանված կարգով կամ դատական կարգով՝ 2 ամսվա ընթացքում:


ՀՀ պետական եկամուտների կոմիտեի իրավաբանական վարչություն

(ստորաբաժանման անվանումը)

Ղեկավար՝

Արման Մնացականյան

(անուն, ազգանուն)



(ստորագրություն)

Որոշման օրինակը՝ _____ էջերի վրա ստացա.

(իրավախախտում կատարած անձի անունը, ազգանունը, հայրանունը կամ տվյալ անձի
ներկայացուցչի անունը, ազգանունը, հայրանունը և լիազորությունը հաստատող
փաստաթղթի տվյալները)

(ստորագրություն)

«__» _____

(որոշման օրինակի ստացման ամսաթիվը)

20__ թ.

Ծանոթություն. Սույն որոշմամբ նշանակված տույժի գումարը ենթակա է վճարման Կենտրոնական գանձապետարանի №900005024055 հաշվեհամարին _19_ ծածկագրով:

Սույն որոշումն անբողոքարկելի դառնալուց հետո «Վարչարարության հիմունքների և վարչական վարույթի մասին» օրենքի 88-րդ հոդվածով սահմանված կարգով և ժամկետներում ուղարկվում է Հայաստանի Հանրապետության հարկադիր կատարումն ապահովող ծառայություն:

Եթե առկա են վերցված ապրանքներ, դրանք վերադարձվում են «Մաքսային կարգավորման մասին» ՀՀ օրենքի 335-րդ հոդվածով սահմանված կարգով և ժամկետներում: